



**Republika e Kosovës**  
**Republika Kosova - Republic of Kosovo**

**ZYRA E RREGULATORIT PËR ENERGIJ<sup>I</sup>**  
**REGULATORNI URED ZA ENERGIJU**  
**ENERGY REGULATORY OFFICE**



Prishtinë: 23.03.2023

Kodi i ZRRE-së: V\_1680\_2023

Bordi i Zyrës së Rregulatorit për Energi

Duke u bazuar në:

- Nenin 9, paragrafi 1, nën-paragradi 1.7, nenin 15 dhe 17 të Ligjit për Rregulatorin e Energjisë (Nr. 05/L-084);
- Nenin 17 dhe 18 të Rregullës për Zgjidhjen e Ankesave dhe Kontesteve në Sektorin e Energjisë;
- Dëshmitë e paraqitura nga palët; dhe
- Rekomandimin e DMK-së të ZRRE-së: ZRRE/DMK\_R\_2410\_02\_23.

në seancën e mbajtur më datë 23.03.2023 nxori këtë:

**V E N D I M**

**I. APROVOHET** si e bazuar ankesa e Operatorit të Sistemit të Transmisionit dhe Tregut (KOSTT SH.A.)

**II. DETYROHET** – Operatori i Sistemit të Shpërndarjes (KEDS SH.A.) që t'i paguaj KOSTT SH.A., faturat për jo balanca për muajin korrik, gusht dhe shtator të vitit 2022, në shumën totale prej 8,517,725.13 Euro

**A r s y e t i m**

Zyra e Rregulatorit për Energji (ZRRE) me datë 12.12.2022 ka pranuar nga Operatori i Sistemit të Transmetimit dhe Tregut (KOSTT SH.A.), kërkesën për inicimin e kontestit kundër Operatorit të Sistemit të Shpërndarjes (KEDS SH.A.) lidhur me:

**Kthimin e faturave për jo-balancet e shkaktuara së bashku me faturat e korrigjimeve për muajt korrik, gusht dhe shtator të vitit 2022.**

KOSTT SH.A., në kërkesën e saj ka shpjeguar shkaqet e inicimit të kontestit duke theksuar se, si Operator i Tregut është i obliguar që të realizoj procesin e barazimit përfundimtar për të gjitha palët përgjegjëse për balancim në Zonën Rregulluese të KOSTT SH.A.

KOSTT SH.A., ka sqaruar se nga korriku i vitit 2022 deri në shtator të vitit 2022, pala KEDS SH.A., nuk i ka pranuar dhe i ka kthyer prapa faturat në lidhje me jo-balancat e shkaktuara duke mos prokuruar energjinë e nevojshme për mbulimin e humbjeve në Shpërndarje. Faturat që nuk janë pranuar në formë të rregullt nga ana e KEDS SH.A., janë dërguar edhe përmes postës, të cilat edhe përmes postës janë kthyer në KOSTT SH.A., nga KEDS SH.A., pa dhënë ndonjë arsyetim.

KOSTT SH.A., thekson se faturat e papaguara në mënyrë të rregullt por të dorëzuara përmes postës KOSTT i ka trajtuar dhe vazhdon ti trajtoj sipas Rregullave të Tregut par. 3.5.1(a)(iii) si dhe fatura për të cilat duhet të kryhet obligimi i pagesës.



Faturat e kthyera për jo-balancet e shkaktuara nga KEDS SH.A., i ka prezantuar edhe në formën tabelore dhe i ka prezantuar me prova, të cilat i ka bashkangjitur në dosjen e iniciuar të kontestit.

KOSTT SH.A., ka sqaruar se, energjia e tërhequr nga interkonekioni në formë të jo-balancave për mbulimin e humbjeve në shpërndarje i është faturuar konsumatorëve si kosto pjesëmarrësve e tarifave fundore e cila është aprovuar nga ZRRE dhe mund të supozohet se edhe janë paguar.

KOSTT SH.A., ka theksuar se, ekziston përgjegjësia e pa kontestuar e KEDS SH.A., që të paguaj faturat për energjinë e tërhequr bazuar në legjisacionin e aplikueshëm, duke prezantuar referenca ligjore dhe interpretime ligjore në lidhje me kontestin e iniciuar.

KOSTT SH.A., thekson se me Ligjin për Energjinë Elektrike gjegjësish dispozitat ligjore të Nenit 16 par. 1 nën paragrafit 1.19 detyra dhe përgjegjësia e Operatorit të Sistemit të Transmisionit është balancimi i sistemit të energjisë elektrike në harmoni me Kodin e Rrjetit të transmisionit dhe Rregullat e Tregut, në nenin 25 par. 1 definohet që secili pjesëmarrës në treg të energjisë elektrike ka përgjegjësi për balancim, dhe neni 28 par. 1 nën parografi 1.21 definon sigurimin e energjisë elektrike për mbulimin e humbjeve në rrjetin e shpërndarjes dhe për shërbimet ndihmëse në rrjetin e shpërndarjes, sipas parimeve të tregut të energjisë elektrike, transparencës dhe jo-diskriminimit.

KOSTT SH.A., thekson se me Rregullat e Tregut gjegjësish nenin 18.2.2 theksohet se: Nga të gjitha palët tregtare kërkohet që të miratojnë të dhënat e Energjisë së Matur dhe të dhënat e faturave provizore në përputhje me procedurat e Rregullave të tregut të përpiluara në përputhje me paragrin 5.1.2(b). Në qoftë se Palët tregtare dështojnë të konfirmojnë të dhënat e Energjisë së matur ose faturat provizore, vlerat do të konsiderohen se janë korrekte dhe OT do të vazhdoj procesin e faturimit.

Gjithashtu me Nenin 18.3.3. të Rregullave të Tregut definohet se : Pala Përgjegjëse për Balancim (PPB) dhe Palët Tregtare do të paguajnë të gjithë shumën e parave për faturat që u janë lëshuar (dhe OT do të paguaj paratë që i takojnë PPB dhe Palëve Tregtare) jo më vonë se pesë (5) Dite Pune pas lëshimit të faturës. Ndërsa Neni 18.3.4. Për çdo mos-pagesë me kohë do të llogaritet kamata ligjore vjetore me shkallë interesit 4.5 % në vlerën e papaguar ashtu siç përcaktohet me Ligjin mbi Marrëdhëniet Detyimore, përvëç nëse shuma e papaguar trajtohet si çështje në mirëbesim.

Ndërsa Nenin 18.5.2 theksohet se: Kur një PPB ose një Palë Tregtare ngrë një Kontest Fature të vërtetë(bona fide) në të gjitha rastet obligimi për pagesën e kësaj fature duhet të bëhet deri në datën e caktuar. Kontest i vërtet është kontesti që mbështetet në prova të sakta, ku provat e sakta definohen si të dhëna origjinale që mbështesin vërtetimin e jo korrektësisë së Barazimit përfundimtar. Në rast të borxhit ndaj ose nga një Llogari e PPB ose Palës Tregtare, pagesa e shumës totale duhet të bëhet siç është faturuar.

Pra, sipas palës KOSTT SH.A., bazuar në nenet e lartcekura të Ligjit për Energjinë Elektrike, KEDS SH.A., është përgjegjës për balancim si dhe sigurimin e energjisë elektrike për mbulimin e humbjeve në rrjetin e shpërndarjes me ç' rast KEDS SH.A., ka bërë shkelje ligjore duke mos përmbrushur obligimet në fjalë si dhe duke refuzuar pagesën e shërbimeve të pranuara.



KOSTT SH.A., thekson së bazuar në Nenin 4 të Rregullës për zgjidhjen e ankesave dhe kontesteve në sektorin e energjisë, ka kërkuar nga ZRRE zgjidhjen e kontestit në afat sa më të shkurtër kohor, respektivisht të detyroj KEDS SH.A., që të pranoj faturat për periudhën korrik-shtator 2022 dhe të paguaj të njëjtat sa më parë.

ZRRE me datë 10 janar 2023 përmes shkresës nr. prot. 011/2023 i ka përcjellë njoftimin për përgjigje të KEDS SH.A., lidhur me inicimin e kontestit nga ana e KOSTT SH.A., nr. 24.83 dt. 12.12.2022, për të paraqitur përgjigjet në lidhje me faturat e kontestuar për jo-balacet e shkaktuara s' bashku me faturat e korrigjimeve të jo-balancave për muajt korrik, gusht dhe shtator 2022.

KEDS SH.A., me datë 18.01.2023 ka ofruar përgjigjet në shkresën nr. 011 të datës 10.01.2023 "Përgjigje e KEDS SH.A., ndaj inicimit të kontestit të KOSTT SH.A. kundër KEDS SH.A. lidhur me faturat e kontestuara për jo-balacat e shkaktuara s' bashku me faturat e korrigjimeve të jo-balancave për muajt korrik, gusht dhe shtator 2022.

KEDS SH.A., thekson se për shkak të krizës energetike në mbar botën, sektori i energjisë në Kosovë është përballuar me rritje enorme të kostove e cila ka rezultuar me pasoja të likuiditetit për ndërmarrjet të cilat operojnë në sektorin e energjisë.

Po ashtu KEDS SH.A., ka theksuar se çmimi i përcaktuar për blerjet nga importi nuk kishte marrë parasysh trenin e rritjes së çmimeve sipas parashikimeve nga tregu HUPEX për ditët dhe muajt në vazhdim. Mos reflektimi i saktë i kostove të humbjeve në vendimin për të Hyrat e Lejuara Maksimale në shkurt të vitit 2022 si dhe rritja e paparashikuar e çmimeve të energjisë elektrike në tregjet ndërkombëtare muajt e fundit ka detyruar OSSH (KEDS SH.A.) të operoj nën-kosto.

KEDS SH.A., thekson se si rezultat i kësaj, OSSH-ja me datë 10 gusht të vitit 2022 ka dërguar shkresë zyrtare tek të gjithë akterët përgjegjës të sektorit të energjisë duke i njoftuar se në gjendjen financiare në të cilën ndodhet kompania aktualisht është e detyruar të nominojë vetëm energjinë elektrike e cila prodhohet nga gjeneratorët vendor dhe i njëjti nuk mund të mbahet përgjegjës për asnjë devijim në sistemin interkonektiv dhe/apo ndonjë pasojë tjetër materiale dhe ligjore.

Ndërsa KEDS SH.A., thekson se me datë 12 gusht 2022, OSSH-ja, në vazhdimësi të shkresës së datës 10 gusht 2022 kishte dërguar shkresën zyrtare KOSTT SH.A., duke kërkuar nga KOSTT SH.A., të ndërmerren të gjitha masat e nevojshme sipas legjisacionit në fuqi për të menaxhuar devijimet pasi që OSSH-ja, nuk do t'i pranoj faturat për jo-balanca eventuale përderisa kostot për sigurimin e energjisë elektrike të nevojshme nuk mbulohen nga tarifat e të licencuarve në fuqi.

Gjithashtu KEDS SH.A., ka theksuar se lidhur me të lartpërmendurat, KEDS SH.A., ka dërguar shpjegime në KOSTT SH.A., gjatë refuzimit të faturave përkatëse, përfshirë këtu faktin se jo-balancat e KEDS - SH.A., nuk janë pjesë e shqyrtimeve tarifore. Megjithëkëtë, OSSH pas analizimeve të bëra pjesërisht mund të pranoj vetëm pjesën e faturës se jo-balancave si rrjedhojë e nominimeve të bëra nga OSSH për atë periudhë. Kjo për shkak se OSSH ka bërë të gjitha paralajmërimet e nevojshme tek të gjithë akterët e sektorit se për shkak gjendjes së rëndë financiare është detyruar të nominojë vetëm energjinë e cila prodhohet në vend, ndërsa KOSTT SH.A., lidhur me këtë nuk i është përmbajtur saktësisht kérkesës



për reduktimin e energjisë në nivel të nominimeve, dhe si rezultat KEDS SH.A., nuk mund të pranoj faturat e jo-balancave gjatë kohës kur janë aplikuar kufizimet, sipas udhëzimeve të KOSTT SH.A. Gjithashtu ka prezantuar një tabelë të vlerave të kontestuara.

Në fund ka theksuar se OSSH-ja, në dhjetor të vitit 2022 ka dërguar në ZRRE, aplikimin për shqyrtim të jashtëzakonshëm të të Hyrave të Lejuara Maksimale në të cilën ka përfshirë kostot e jo-balancave për muajt korrik-shtator 2022. Përkatësisht nëse këto kosto të njihen nga ZRRE, OSSH do t'i pranoj faturat e kontestuara, në të kundërtën të njëjtat nuk mund të pranohen nga KEDS.

ZRRE ka bërë administrimin e provave dhe atë: Shkresën Nr.2013 të datës 19.10.2022, Shkresën Nr.2151 të datës 26.10.2022 dhe Shkresën Nr. 2258 të datës 10.11.2022, Shkresën Nr. 2277 të datës 11.11.2022, Shkresën e KEDS Nr. 95 të datës 17.11.2022, Shkresën Nr. 2420 të datës 05.12.2022, Shkresën Nr. 105 të datës 21.12.2022 dhe Shkresën Nr. 03 të datës 18.01.2023.

#### Analiza e kontestit

ZRRE vlerëson kontestin e iniciuar nga KOSTT SH.A., në përputhje me Nenin 17 par. 1 nën paragrafin 1.2 të Ligjit për Rregullatorin për Energji dhe Nenin 17 dhe 18 të Rregullës Nr. 04/2017 për zgjidhjen e ankesave dhe kontesteve në sektorin e energjisë dhe provave të administruara në seancën e shqyrtimit, ku ka konstatuar se kërkesa e KOSTT SH.A. është e bazuar.

ZRRE vlerëson se bazuar në provat e administruara, vërtetohet se KEDS SH.A. në muajt korrik, gusht dhe shtator 2022, nuk ka prokuruar blerje të energjisë për mbulimin e humbjeve përtej sasive të prodhuara nga KEK, duke lenë sasi të caktuara të kërkesës së KEDS SH.A., të pambuluara në aspektin ligjor.

Në praktikë, kjo do të thotë që konsumatorët janë furnizuari me energjinë elektrike, ku si rezultat i këtij furnizimi ka pasur mos-balancim të vazhdueshëm në mes të konsumit të energjisë elektrike në vend dhe energjisë së ofruar nga operatorët përgjegjës në treg, në ketë rast KEDS SH.A., ka shkaktuar disbalanca të konsiderueshme në sistemin e interkonjekzionit. Nga kjo shihet qarët se KEDS SH.A., për të ju shmangur blerjes (importit) të energjisë elektrike përtej sasive që mbulohen nga gjenerimi i KEK SH.A., pavarësisht njoftimeve nga ana e Operatorit të Tregut (OT), me dashje ka nominuar sasi më të vogla të energjisë në raport me kërkesën e tij. Ky veprim i KEDS SH.A., është në kundërshtim me nenin 28 pika 1 nën paragrafi 1.21 dhe nenin 25 pika 1 të Ligjit për Energjinë Elektrike.

Po ashtu nga shkresat e lëndës vërehet se KEDS SH.A., nuk ka kontestuar energjinë e matur dhe nuk ka prezantuar prova për jo korrektësinë e barazimit përfundimtar, andaj, faturat për muajin korrik, gusht dhe shtator të vitit 2022 të përgatitura nga KOSTT SH.A., për pagesën e jo balancave siç parashihet në nenin 15 dhe nenin 16 të Rregullave të Tregut janë korakte dhe të sakta. Kthimi i faturave nga KEDS SH.A., nuk ka asnjë mbështetje ligjore dhe si të tillë janë në kundërshtim të plotë me Rregullat e Tregut. Për me tepër, vlen të theksohet se nen 18.5.2 i Rregullave të Tregut përshkruan në mënyrë shprehimore, se kur një Palë Tregtare ngrë një kontestim fature, në të gjitha rastet obligimi për pagesën e kësaj fature duhet të bëhet deri në datën e caktuar në faturë. Mos pranimi i faturave dhe kthimi i tyre nga KEDS SH.A., pa mbështetje ligjore, ka shkaktuar pasoja materiale për KOSTT SH.A.



Për sa u përket pretendimeve të KEDS SH.A, se mos pranimi i faturave dhe kthimin e tyre përmes shkresave zyrtare mbështetet në tri arsyë të cekura në vazhdim:

- Nominimin vetëm në sasinë e prodhuar në vend për arsyë të gjendjen financiare;
- Njohjen e kostove të sigurimit të energjisë së nevojshme në tarifa; dhe
- Mos menaxhimin e duhur të devijimeve nga KOSTT SH.A.

ZRRE vlerëson me të drejt se asnjëra nga këto tri arsyë nuk mbështet në dispozita ligjore për sa i përket pagesave të faturave për energjinë e jo balancave, dhe pretendimet e KEDS SH.A., fare nuk qëndrojnë dhe si të tilla i konsideron veprime të kundërligjshme dhe jo të drejta.

ZRRE vlerëson se, deklarimet e KEDS SH.A., se do të nominojë vetëm sasinë e energjisë së prodhuar nga gjeneratorët vendorë dhe nuk do të mbahet përgjegjës për asnjë devijim bie në kundërshtim me nenin 28 par. 1 nën paragrin 1.21 dhe nenin 25 pika 1 të Ligjit për Energjinë Elektrike. Këto dispozita ligjore kërkojnë që KEDS SH.A., të sigurojnë energjinë elektrike për mbulimin e humbjeve në Rrjetin e Shpërndarjes dhe për shërbimet ndihmëse në rrjetin e shpërndarjes, sipas parimeve të tregut të energjisë elektrike, transparencës dhe jo-diskriminimit, si dhe KEDS SH.A., si palë përgjegjëse në treg të energjisë elektrike ka përgjegjësi për balancim.

ZRRE vlerëson se, dispozitat ligjore të Rregullës për vendosjen e të Hyrave të Lejuara Maksimale përcaktojnë procesin e përshtatje të rregulla vjetore duke përfshirë Nën-mbulimin apo mbi-mbulimi i kostove të lejuara të humbjeve në vitin aktual relevant, që mund të vijnë si pasojë e ndryshimeve të volumeve të energjisë elektrike të parashikuar dhe asaj të shpërndarë dhe çmimeve referente të tregut energjisë elektrike, subjekt i ndarjes së nën apo mbi-mbulimit të tillë në mes të OSSH-së dhe shfrytëzuesve të sistemit të shpërndarjes.

ZRRE vlerëson se KEDS SH.A, në deklarimet e saj ka theksuar se nuk do t'i pranojë faturat për jo balanca për derisa kostot për sigurimin e energjisë së nevojshme nuk mbulohen në tarifa, dhe si të tilla nuk ia fali besimin për faktin se me asnjë fakt qoftë formal apo ma trial nuk ka prezantuar prova konkrete në shkresat e lëndës se kostot për blerjen e humbjeve janë tejkaluar.

ZRRE po ashtu vlerëson se KEDS SH.A, gjatë muajve korrik, gusht dhe shtator të vitit 2022, ka nën-nominuar në mënyrë konsistente në raport me konsumin e tyre dhe, si rezultat, sistemi elektroenergetik i Kosovës ka tërhequr në mënyrë të pa-autorizuar energji elektrike nga sistemet fqinje. Duhet theksuar se energjia e tërhequr nga interkonjekioni në formë të jo balancave për mbulimin e humbjeve në shpërndarje është konsumuar nga konsumatorët, dhe si rezultat i kësaj duhet edhe të paguhet.

ZRRE vlerëson se KOSTT SH.A., ka vepruar drejt dhe ka zbatuar kornizën ligjore ku ka përgatitur faturat për energjinë e tërhequr në formë të ja balanceve, të cilat i ka dërguar në KEDS SH.A., por kjo e fundit nuk i ka pranuar e për të cilën KEDS SH.A., ka vepruar në kundërshtim me dispozitat ligjore në fuqi të cekura më lartë.



ZRRE vlerëson se, në bazë të Rregullave të Tregut, gjegjësisht nenin 11, Nominimet Fizike, Nominimet Kontraktuale, Ofertat për Shitje dhe Ofertat për Blerje .... par. 11.1.9, 'Palët Tregtare të ndihmojnë OST në kryerjen e obligimeve ndaj ENTSO-E për minimizimin e Devijimeve të Paqëllimshme. Palët Tregtare janë përgjegjëse të sigurojnë që injektimi dhe konsumi momental të jetë sa më afër vlerës që është nominuar tek OT nga ana e tyre.

Në këtë kuptim, në bazë të Kodit të Balancit, neni 2.5.1.2, OST do të njoftojë palët e tregut të energjisë elektrike për çdo periudhë apo periudhë potenciale të pamjaftueshmërisë së furnizimit duke pritur që KEDS të ndërmarr masat e nevojshme, KOSTT SH.A., vazhdimisht ka njoftuar palën që të ndërmerr masat e nevojshme për plotësimin e kërkesës.

Pavarësisht këtyre njoftimeve dhe kërkesave të vazhdueshme, KEDS SH.A., ka vazhduar qëllimi shtesë me praktikën e nominimit më të ulët se sa kërkesa e KEDS SH.A., për mbulimin e humbjeve në rrjetin e shpërndarjes, të paraqitur në reportin e kalkulimit të humbjeve, të dërguar nga KEDS SH.A. në KOSTT SH.A., për qëllim të alokimit të energjisë së prodhuar nga KEK, duke shkaktuar devijime të qëllimshme, si rrjedhojë KEDS SH.A., është dashur të prokurojë energjinë elektrike për mbulimin e humbjeve në përputhje me kërkesën, sipas dispozitave ligjore që parashihen nenin 28 pika 1 nën paragrafi 1.21 dhe të jetë palë përgjegjëse për balancim siç parashihet në nenin 25 pika 1 të Ligjit për Energjinë Elektrike.

ZRRE vlerëson se KOSTT SH.A., në rolin e Operatorit të Tregut është i obliguar që të realizojë procesin e barazimit përfundimtar për të gjitha palët përgjegjëse përfshirë edhe KEDS SH.A., për balancim në zonën rregulluese dhe në mënyrë të drejtë për energjinë e jo-balancave e ka faturuar KEDS SH.A., për muajt korrik, gusht dhe shtator 2022, duke zbatuar drejt dispozitat ligjore në fuqi.

Andaj, referuar shkresave të lëndës dhe administrimit të provave, vërtetohet se KEDS SH.A. mban përgjegjësi të plotë që të përbush obligimet ligjore në lidhje me faturat e jo balancave për muajt korrik, gusht dhe shtator 2022, dhe ta paguaj shumën totale prej 8,517,725.13 Euro

Bordi i ZRRE duke pasur parasysh te gjitha faktet e përmendura me lartë, dëshmitë dhe argumenteve të paraqitura nga palët në kontest, ka vlerësuar se kërkesa e KOSTT SH.A., është e bazuar, dhe duke u mbështetur në dispozitat ligjore të Ligjit për Energjinë Elektrike Nr. 05/L-085, Rregullat e Tregut, pas analizimit të krejt asaj që u theksua më lartë, ka vendosur si në dispozitivin e këtij vendimi.

- III. Vendimi nxirret në gjuhën shqipe dhe do të përkthehet në gjuhën serbe dhe angleze. Në rast të mospërputhjes në mes të versioneve, do të mbisundojë versioni në gjuhën shqipe.
- IV. Vendimi hyn në fuqi në datën e miratimit nga Bordi, dhe do të publikohet në faqen elektronike zyrtare të ZRRE-së.



**Këshillë Juridike:** Pala e pakënaqur me këtë Vendim mund të iniciojë konflikt administrativ në Gjykatën Kompetente, brenda tridhjetë (30) ditëve nga data e pranimit të Vendimit ose data e publikimit të tij në faqen elektronike të ZRRE-së, cilado që ndodhë e fundit.

Bordi i ZRRE-së:

Ymer Fejzullahu, Kryesues

Lutfije Dervishi, anëtare

Gani Buçaj, anëtar

Vendimi iu dërgohet:

- Të licencuarit: KOSTT
- KEDES-it dhe
- Arkivit të ZRRE-së.